



SPORT

Ski alpin: campjunadi grischun a Laax

Quatterdobra victorgia per noss skiunzs



Fadri Janutin flanco da sies bab Christian e da sia mamma Bigna.

● **G.N.S. Domino las cursas tar igls mats U14, ò Fadri Janutin e tar igls mats U12, Silvano Gini. Tots dus èn stos quatter gedas igl pi sensom igl podest ed an veir senn declasso la concorrenza. Medaglias on pero er gudagnea skiunzas e skiunzs da Lai.**

Egn digls puncts culminonts dalla staschung da skis per la garda giova è adegna er igl campjunadi grischun. Avant en onn tar chel agl Corvatsch vevan Moreno Caplazi da Barvogn e Silvano Bergamin da Cunter fatg furore, dantant er Fadri Janutin da

Marmorera, tgi stat a Landquart era turno a tgesa cun duple tgi ena medaglia. Alla fegn dall'emda passada ò gia li a Laax igl campjunadi grischun da skis alpin 2014 e tar chel on an spezial Fadri Janutin e Silvano Gini, igl mat da 12 onns, tgi è da Beiva e sesent a Son Murezza scretg istorgia. Tots dus on gudagnea igl Super-G, igl slalom gigant, igl slalom ed uscheia er la cumbinaziun. Cun chels success on igls dus skiunzs procurò gist ainten dus categorias per ena quatterdobra victorgia surmirana. Fadri Janutin è sto chel tgi ò persuadia igl pi fitg tar igls mats U14 e

Silvano Gini ò strousch gia concorrenza ainten la categoria mats U12.

Nia a freida cun la rolla da favorit

Siva dad ena victorgia siva l'otra tar las cursas dalla coppa Raiffeisen Ochnser era naturalmaintg Fadri Janutin er igl grond favorit a Laax tar igls mats da 13 e 14 onns. Igl fundamaint per sies success ò el fatg cun gudagner igl Super-G ed uscheia confirmo tgi el era er mental segl post. Nia a freida cun la rolla da favorit è Fadri Janutin dantant er aint igl slalom gigant, sia disciplina prefereida. Per gudagner la cumbinaziun e davanter campjun grischun davigl navot oter tgi da contanscher en bung resultat er aint igl slalom. Pero er ainten chella disciplina ò igl mat musso tgi el ò betg per navot gia l'antiera staschung success. Fadri Janutin ò er gudagnea igl slalom e surstar fò cunzont sies taimp. Cugl taimp dad 1 minuta, 46 secundas e 39 tschentavels è el angal sto per 70 tschentavels pi plang tgi Yannick Caduff da Faler, igl victour digl slalom dalla categoria mats U16. Cun chel taimp excellent vessigl cunzont tanschia a Fadri Janutin da neir vicecampjun grischun tar igls mats da 16 onns. Las quatter medaglias saron la migra mutivaziun pigl campjunadi svizzer dad JO, tgi scumainza dumang a Les Diablerets, noua tgi Fadri Janutin ò occasiun da sa misirar cun la

concorrenza naziunala e cunzont er da far bunas experientschas.

Puspe sang

Turno a tgesa cun quatter medaglias dad òr è betg angal Fadri Janutin, mabagn er Silvano Gini. Cun gudagner a Laax tottas treis cursas ed er la cumbinaziun ò el testifitgia tgi sia blessura è curada e tgi el è puspe sang. Sa participar agl campjunadi on angal pudia igls mats da 12 onns tgi vevan adempia igls criteris scretgs avant pigl campjunadi grischun da skis alpin. Cun esser igl Bivian chest anvien igl ple davant ainten las rangaziuns ò el ansomma gia nigna fadeia da sa qualifitgier per las cursas agl Crap Sogn Gion. Agl manc a Laax on sies concurrents betg gia stetg cun dominar Silvano Gini chella occurrenza, tgi era organisada perfetg digls Sursilvans.

Dus medaglias per Vivian Derungs

Ena medaglia da bronz ò er fatg Silvano Rogentin da Lai e chegl aint igl Super-G, categoria mats U16. Gia disfurtegn ò el cunzont cun mantgantar per pac igl terz post ainten la cumbinaziun. Vicecampjunessa grischuna aint igl Super-G è neida tar las mattas U16 Vivian Derungs da Lai. La medaglia da bronz ò ella alloura gudagnea aint igl slalom gigant ed aint igl slalom è ella crudada or. Uscheia ò Vivian Derungs er mantganto da far ena medaglia ainten la cumbinaziun.



Ena classa per sasez è sto Fadri Janutin tar las cursas digl campjunadi grischun da skis a Laax.



Cun luschezza mossa Silvano Gini las treis medaglias dad òr, avant tgi el ò er anc retschet chella per la cumbinaziun.

